

KANDUNGAN

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9 HINGGA NO. 51)**

9 NOV 2016

NOTA: [RUJUK PENYATA RASMI HARIAN (HANSARD)]

**NURELFIRA BINTI MOHD DAUD
SEKSYEN PERUNDANGAN & PROSIDING
PARLIMEN MALAYSIA**

SIDANG DEWAN RAKYAT
MESYUARAT KETIGA, PENGGAL KEEMPAT
PARLIMEN KETIGA BELAS (2016)

PERTANYAAN : **LISAN**
DARIPADA : **YB DR. MANSOR BIN ABD RAHMAN**
 [SIK]
TARIKH : **9 NOVEMBER 2016 [RABU]**
SOALAN : **9**

minta **MENTERI SAINS, TEKNOLOGI DAN INOVASI** menyatakan perbezaan di antara *contract farming* yang dilaksanakan di bawah *Bioeconomy Community Development Programme* (BCDP) dengan program *contract farming* sedia ada serta impaknya kepada komuniti yang terlibat.

JAWAPAN:

Tuan Yang di-Pertua,

Salah satu langkah Kementerian Sains, Teknologi dan Inovasi (MOSTI) dalam memajukan Bioekonomi ialah melalui Program Pembangunan Komuniti Bioekonomi (BCDP) yang diselia oleh Malaysian Bioeconomy Development Corporation (Bioeconomy Corporation). BCDP merupakan satu program di bawah *Bioeconomy Malaysia Accelerator Programmes* (atau Bio-Accelerators) yang telah diumumkan oleh Yang Amat Berhormat Perdana Menteri di dalam ucapan Belanjawan 2014.

Melalui BCDP, tanah-tanah terbiar yang dikenal pasti akan dapat dibangunkan melalui aplikasi bioteknologi dan perladangan kontrak untuk menambah nilai industri pertanian dan pendapatan petani. Pelaksanaan BCDP memainkan peranan yang penting dalam menambahbaik ekonomi rakyat (*people economy*) terutamanya kumpulan isi rumah berpendapatan 40% terendah (isi rumah B40), selaras dengan Teras 1 – Memperkuuh inklusiviti ke arah masyarakat yang saksama, yang digariskan di dalam Rancangan Malaysia Kesebelas (RMKe-11).

BCDP bertujuan membangunkan petani/koperasi/persatuan yang kurang berkemahiran untuk menjadi *Bio-Agropreneur* dengan memanfaatkan syarikat-syarikat berstatus BioNexus dan projek-projek *Trigger Program Transformasi Bioekonomi (BTP)* sebagai syarikat peneraju bagi menyediakan latihan teknikal, teknologi serta jaminan belian balik. Aplikasi teknologi berdasarkan bio (sebagai contoh, *marker assisted selection (MAS)*, kultur tisu, pengekstrakan kompaun aktif, dsb.) serta perjanjian belian balik merupakan kelebihan utama yang membezakan BCDP dengan perladangan kontrak konvensional yang lain.

Penggunaan aplikasi teknologi daripada syarikat peneraju membolehkan petani mempertingkatkan pengeluaran, standard dan produktiviti. Hasilnya, projek-projek BCDP dapat dijalankan dengan lebih cepat berbanding perladangan kontrak konvensional. Sebagai contoh, projek BCDP Pengeluaran Biji Benih menggunakan biji benih hibrid yang diketahui mempunyai tempoh matang sehingga 15 hari lebih cepat berbanding varieti lain. Hasil pengeluaran daripada biji benih hibrid juga adalah lebih banyak berikutan daripada penambahbaikan dari segi kerintangan penyakit genetik serta nisbah bunga jantan/betina yang

lebih tinggi. Keseragaman hibrid juga memberikan kestabilan kepada kualiti produk dan petani tidak perlu mengambil masa yang lama untuk menguruskan tanaman.

Petani terlibat juga tidak perlu memikirkan cara untuk memasarkan hasil pertanian kerana mereka akan mendapat jaminan pendapatan melalui perjanjian belian balik dengan syarikat peneraju. BCDP turut memberi faedah kepada syarikat peneraju dengan cara meningkatkan pendapatan mereka melalui bekalan bahan mentah yang konsisten dan mampan, di samping mengurangkan kebergantungan terhadap bekalan bahan mentah yang diimport dari luar negara.

BCDP telah diterima sebagai salah satu inisiatif Strategi Lautan Biru Kebangsaan (NBOS) pada 27 April 2015. Projek-projek BCDP sedia ada adalah tertumpu kepada sub-sektor strategik iaitu Penanaman Herba Bernilai Tinggi, Pembangunan Biji Benih, Akuakultur, Penanaman Cendawan, Penternakan Lembu Tenusu dan Penternakan Lebah Madu.

Tuan Yang di-Pertua,

Setakat September 2016, sebanyak 28 projek-projek BCDP telah dilaksanakan di seluruh negara mengikut pelbagai peringkat tertentu dengan pelibatan 747 orang petani. Projek-projek ini turut memberi impak secara langsung kepada 3,586 penduduk. Melalui program ini, komuniti telah dihubungkan secara langsung dengan pemain industri berdasarkan bio dan kemahiran mereka dapat dipertingkatkan melalui latihan teknikal dan teknologi daripada syarikat peneraju.

Sekian, terima kasih.

PERTANYAAN DEWAN RAKYAT

PERTANYAAN : **LISAN**
DARIPADA : **YB. PUAN SITI ZAILAH BINTI MOHD**
YUSOFF
KAWASAN : **RANTAU PANJANG**
TARIKH : **9 NOVEMBER 2016, RABU**

SOALAN:

YB. PUAN SITI ZAILAH BINTI MOHD YUSOFF minta **MENTERI KERJA RAYA** menyatakan apakah status terkini kemajuan projek Lebuhraya Central Spine Road (CSR) yang menyambung antara Kuala Lumpur sehingga ke Kelantan kerana kemudahan jalan raya yang sempurna ini amat diperlukan oleh rakyat negeri Kelantan.

JAWAPAN:

Tuan Yang Di-Pertua;

Sebagaimana Ahli Yang Berhormat sedia maklum, pembinaan projek Jalan Central Spine dibuat secara berfasa. Ini kerana ia melibatkan kos yang sangat tinggi, iaitu sebanyak RM8.5 bilion untuk jarak keseluruhan jalan sepanjang 403km.

Pada masa kini 41.35km atau 10% daripada jarak keseluruhan Jalan Central Spine (Bentong ke Kota Bharu) telah disiapkan dan dibuka kepada lalu lintas, iaitu melibatkan laluan dari Kg. Kubang Rusa ke Kg. Seberang Jelai di Pahang. Manakala pakej-pakej lain yang sedang dalam peringkat pembinaan ialah melibatkan laluan

Pasir Hor – Kadok – Ketereh (Kelantan), Mentara – Kg Kubang Rusa; Kg Asap – Kg. Sertik; dan Jalan Pintasan Bentong (Pahang). Pakej-pakej ini akan dirancang akan siap secara berperingkat-peringkat iaitu sehingga bulan September 2019.

Untuk makluman Ahli Yang Berhormat, setakat ini keutamaan Kerajaan untuk pelaksanaan projek CSR ialah melibatkan laluan di Lipis, Pahang (faktor keselamatan), Bentong, Pahang (faktor kesesakan) dan sebahagian laluan di Kota Bharu, Kelantan. Manakala bagi jajaran Jalan Central Spine di kawasan-kawasan lain akan dilaksanakan secara berperingkat dalam tempoh RMKe-11 dan seterusnya, tertakluk kepada kelulusan peruntukan daripada Agensi Pusat.

Sekian. Terima kasih.

PEMBERITAHUAN PERTANYAAN DEWAN RAKYAT

PERTANYAAN : LISAN
DARIPADA : DATO' WIRA OTHMAN BIN ABDUL
TARIKH : 9.11.2016
SOALAN : NO. 11

Dato' Wira Othman bin Abdul [Pendang] minta **MENTERI PENDIDIKAN TINGGI** menyatakan apakah kriteria-kriteria yang digunakan oleh agensi penarafan antarabangsa untuk mengkelaskan kedudukan sesebuah universiti terutamanya di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Tinggi (KPT) memberi tumpuan kepada tiga (3) sistem ranking utama iaitu *QS World University Rankings* (QSWUR), *Times Higher Education World University Rankings* dan *Shanghai Academic Ranking of World Universities*.

Sistem ranking ini secara dasarnya memberi pemberat yang tinggi untuk *output* penyelidikan seperti bilangan sitasi dan jumlah penerbitan di dalam jurnal berindeks. KPT merujuk sistem QSWUR sebagai rujukan kerana sistem telah matang dan menyediakan perspektif yang lebih luas seperti ranking bersifat *regional*, ranking untuk subjek/bidang dan ranking untuk universiti baharu yang lebih bertepatan dengan aspirasi dan perancangan KPT.

Kriteria yang dinilai di dalam sistem ranking QSWUR adalah meliputi perkara-perkara berikut:

- (a) Reputasi akademik;
- (b) Nisbah pelajar per pensyarah;
- (c) Jumlah sitasi per pensyarah;
- (d) Reputasi di kalangan majikan;
- (e) Nisbah pensyarah antarabangsa; dan
- (f) Nisbah pelajar antarabangsa.

Pelbagai usaha berterusan dilaksanakan oleh KPT dalam memperbaiki dan memperkuatkukan ranking UA tempatan. Antaranya, ialah menanda aras dengan universiti di negara yang mempunyai pemetaan sosio-ekonomi dan sosio-budaya yang hampir sama

tetapi mendapat penarafan yang tinggi di peringkat global seperti universiti di Korea Selatan, Thailand dan Singapura.

Selain itu, KPT turut menyerlahkan bidang tujuan dan bidang kecemerlangan di UA agar ia setanding dengan pusat kecemerlangan yang bertaraf antarabangsa, di samping terus-menerus memperkasakan Universiti Penyelidikan melalui pemantapan pembelajaran dan pengajaran, jaringan industri dan komuniti di UA serta aktiviti penyelidikan dan penerbitan yang dapat membantu menjana pendapatan universiti UA.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN V. SIVAKUMAR

TARIKH :

SOALAN : 12

Tuan V. Sivakumar [Batu Gajah] minta **PERDANA MENTERI** menyatakan jumlah peruntukan di bawah SEDIC yang telah dibayar sepanjang tahun 2016 (senaraikan nama penerima dan jumlah yang diperolehi oleh mereka). Bagaimanakah program-program yang ditaja oleh SEDIC telah berjaya memantapkan ekonomi kumpulan sasaran.

JAWAPAN: YB DATO' SERI DEVAMANY, TIMBALAN MENTERI DI
JABATAN PERDANA MENTERI

Tuan Yang di-Pertua,

Unit Khas Program Pembangunan Sosioekonomi Masyarakat India (SEDIC) telah ditubuhkan pada 2 Mei 2014 di bawah Jabatan Perdana Menteri untuk mengendalikan peruntukan kerajaan bagi menjalankan program intervensi strategik demi meningkatkan status sosioekonomi masyarakat India, khasnya golongan B40 (pendapatan isi rumah 40% ke bawah). Objektif utama SEDIC adalah memastikan bantuan dana yang disalurkan oleh kerajaan kepada masyarakat India ditadbir urus dengan efisien, integriti, mencapai kumpulan sasaran, membawa impak positif kepada kumpulan sasaran dan dipantau secara holistik.

Fungsi SEDIC adalah untuk mempelawa cadangan projek, menyemak, menilai, melulus dan mengedarkan dana serta memantau pelaksanaan program-program pembangunan sosioekonomi masyarakat India melalui peruntukan kewangan daripada Kerajaan.

Bagi tahun 2016, SEDIC telah diperuntukkan RM100 juta untuk membiayai program pembangunan sosioekonomi masyarakat India. Namun, disebabkan kekangan kewangan dan proses kajian semula bajet, peruntukan tersebut telah dikurangkan kepada RM60 juta. Daripada jumlah tersebut sejumlah RM7 juta pula telah disalurkan balik kepada Unit Penyelaras dan Pelaksanaan, Jabatan Perdana Menteri untuk kegunaan projek khas.

Maka, daripada RM53 juta yang dikendalikan oleh SEDIC pada tahun 2016, sebanyak RM40 juta merupakan perbelanjaan komited bagi menampung 22 program kelolaan Institut Latihan Kemahiran Swasta (ILKS) dan 124 program kelolaan Badan Bukan Kerajaan (NGO). Bagi

baki RM13juta proses penilaian rapi sedang dijalankan dan menghampiri peringkat akhir sebelum pengumuman dapat dibuat. Adalah dijangka bahawa baki peruntukan ini akan dapat diagihkan sebelum akhir bulan November 2016.

Projek-projek yang ditaja SEDIC sepanjang tahun 2014 hingga 2015 telah berjaya memberi impak kepada masyarakat India terutamanya golongan berpendapatan terendah (B40) dari seluruh Negara. Tumpuan khas diberikan kepada lokasi-lokasi yang mempunyai populasi masyarakat India yang tinggi. Sepanjang tempoh ini, lebih dari 300,000 masyarakat India yang terdiri daripada pelbagai kategori seperti guru, murid, belia berisiko tinggi, ibu tunggal dan pekerja berpendapatan rendah telah berjaya mendapat manfaat daripada program-program tajaan SEDIC.

Hasil penyertaan dalam program-program tajaan SEDIC, impak utama yang dapat dilihat pada para peserta adalah peningkatan pendapatan. Para peserta telah mendapat kemahiran dan ilmu keusahawanan yang telah membolehkan mereka menceburi bidang perniagaan seperti jahitan, masakan, persolekan, pertanian, penternakan lembu dan juga perniagaan-perniagaan unik seperti landskap, pemprosesan kacang putih dan memandu teksi. Hampir 7000 kanak-kanak dari golongan berpendapatan rendah dari seluruh Negara kini mengikuti pendidikan pra sekolah tajaan SEDIC, JPM. Guru-guru pra sekolah juga telah diberi latihan untuk meningkatkan kompetensi yang telah secara langsung meningkatkan pendapatan mereka.

Selain itu, impak juga dapat dilihat pada para belia terutamanya mereka daripada golongan dan kawasan berisiko tinggi yang telah diberi kemahiran sehingga dapat melanjutkan pelajaran atau mendapat pekerjaan yang memberi pendapatan yang baik. Program intervensi pada peringkat sekolah menengah juga telah memberi impak dan menfaat kepada pelajar-pelajar berisiko tinggi secara langsung. Impak secara tidak langsung juga dapat dilihat daripada kursus-kursus *soft skill*, motivasi, keagamaan yang telah berjaya mentransformasi minda masyarakat India di samping mendorong mereka mengubah gaya hidup untuk meningkatkan taraf hidup mereka.

SEDIC bersama agensi Kerajaan yang lain sentiasa menjalankan pemantauan yang rapi untuk memastikan program-program yang ditaja mencapai matlamat dan objektif yang diharapkan. Usaha SEDIC dan Kerajaan akan sentiasa berterusan untuk meningkatkan taraf sosioekonomi masyarakat India khususnya dan rakyat Malaysia amnya. Untuk maklumat lanjut, sila layari laman web www.sedic.my.

Sekian, terima kasih.